

四庫全書

集部

欽定四庫全書

劉賓客文集卷二十六

唐 劉禹錫 撰

樂府上

團扇歌

團扇復團扇奉君清暑殿秋風入庭樹從此不相見上  
有乘鸞女蒼蒼網蟲遍明年入懷袖別是機中練

荊州歌二首

渚宮楊柳暗麥城朝雉飛可憐蹋青伴乘煥著輕衣

今日好南風商旅相催發沙頭檣竿上始見春江濶

紀南歌

風烟紀南城塵土荆門路天寒多獵騎走上樊姬墓

宜城歌

野水遶空城行塵起孤驛荒臺側生樹石碣陽鐫額靡  
靡度行人溫風吹宿麥

順陽歌

朝辭官軍驛前望順陽路野水齧荒墳秋蟲鏤官樹曾

聞天寶末胡馬西南驚城守魯將軍拔城從此去

馬嵬行

綠野扶風道黃塵馬嵬驛路邊楊貴人墳高三四尺乃  
問里中兒皆言幸蜀時軍家誅佞倖天子捨妖姬羣吏  
伏門屏貴人牽帝衣低回轉美目風日為無暉貴人飲  
金屑倏忽薨英莫平生服杏丹顏色真如故屬車塵已  
遠里巷來窺覷共愛宿妝妍君王畫眉處履綦無復有  
履組光未滅不見巖畔人空見陵波襪郵童愛蹤跡私

手解槃結傳看千萬眼縷絕香不歇指環照骨明首飾  
敵連城將入咸陽市猶得賈胡驚

視刀環歌

常恨言語淺不如人意深今朝兩相視脈脈萬重心

三閤辭四首

吳聲

貴人三閤上日晏未梳頭不應有恨事嬌甚卻成愁  
珠箔曲瓊鉤子細見揚州北兵那得度浪語判悠悠  
沈香帖閣柱金縷畫門楣回首降幡下已見黍離離

三人出簪井一身登檻車朱門漫臨水不可見鱸魚

更衣曲

博山炯炯吐香霧紅燭引至更衣處夜如何其夜漫漫  
鄰雞未鳴寒雁度庭前雪壓松桂叢廊下點點懸紗籠  
滿堂醉客爭笑語嘈囂琵琶青幕中

淮陰行五首

古有長干行言三江之事悉矣余嘗阻風淮陰作淮陰  
行以裨樂府

簇簇淮陰市行樓緣岸上好日起檣竿鳥飛驚五兩  
金日轉船頭金烏指西北烟波與春草千里同一色  
船頭大銅鑲摩挲光陳陳蚤晚使風來沙頭一眼認  
何物令儂羨羨羨郎船尾燕銜泥趁檣竿宿食長相見  
隔浦望行船頭昂尾憶憶無奈挑菜時清淮春浪軟

競渡曲

競渡始於武陵至今舉槳而相和之其音咸呼云何在此斯招屈之義事見

圖經

沅江五月平隄流邑人相將浮綵舟靈均何年歌已矣

哀謠振楫從此起揚枹擊節雷闐闐亂流齊進聲轟然  
蛟龍得雨鬣鬣動螭螭飲河形影聯刺史臨流褰翠幃  
揭竿命爵分雄雌先鳴餘勇爭鼓舞未至銜枚顏色沮  
百勝本自有前期一飛由來無定所風俗如狂重此時  
縱觀雲委江之湄綵旗夾岸照鮫室羅襪陵波呈水嬉  
曲終人散空愁莫招屈亭前水東注

隄上行三首

酒旗相望大隄頭隄下連牆隄上樓日暮行人爭渡急



槳聲幽軋滿中流

江南江北望烟波入夜行人相應歌  
桃葉傳情竹枝怨  
水流無限月明多

長隄繚繞水裴回酒舍旗亭次第開  
日晚上簾招估客  
輶我大艑落颿來

采菱行

武陵俗嗜菱菱歲秋矣有女郎咸遊  
于馬湖薄言采之歸以御客古有采

菱曲罕傳其詞故

賦之以俟采詩者

白馬湖平秋日光紫菱如錦綵  
鴛鴦翔盪舟遊女滿中央

采菱不顧馬上郎爭多逐勝紛相向時轉蘭橈破輕浪  
長鬟弱袂動參差釵影釧文浮蕩漾笑語哇咬顧晚暉  
蓼花緣岸扣船歸歸來共到市橋步野蔓繁船萍滿衣  
家家竹樓臨廣陌下有連檣多估客攜觴薦菱芡夜經過  
醉蹋大隄相應歌屈平祠下沅江水月照寒波白烟起  
一曲南音此地聞長安北望三千里

秋風引

何處秋風至蕭蕭送雁羣朝來入庭樹孤客最先聞

莫徭歌

莫徭自生長名字無符籍市易雜鮫人婚姻通木客星  
居占泉眼火種開山脊夜渡千仞谿含沙不能射

蠻子歌

蠻語鈎輈音蠻衣斑斕布熏狸掘沙鼠時節祠盤飴忽  
逢乘馬客悅若驚鷹顧腰斧上高山意行無舊路

洞庭秋月行

洞庭秋月生湖心曾波萬頃如鎔金孤輪徐轉光不定

遊氣濛濛隔寒鏡是時白露三秋中湖平月上天地空  
岳陽城頭莫角絕蕩漾已過君山東山城蒼蒼夜寂寂  
水月逶迤繞城白盪漿已童歌竹枝連檣估客吹羌笛  
勢高夜久陰力全金氣肅肅開清蹕浮雲野馬歸四裔  
首冠星斗當中天天雞相呼曙霞出斂影含光讓朝日  
日出喧喧人不閑夜夜清景非人間

蹋歌詞四首

春江月出大隄平隄上女郎連袂行唱盡新詞歡不見

紅霞映樹鷓鴣鳴

桃蹊柳陌好經過  
鐙下妝成月下歌  
為是襄王故宮地  
至今猶自細腰多

新詞宛轉遞相傳  
振袖傾鬟風露前  
月落烏啼雲雨散  
遊童陌上拾花鈿

日莫江南聞竹枝  
南人行樂北人悲  
自從雪裏唱新曲  
直到三春花盡時

華清詞

日出驪山東，裏裏照溫泉。樓臺影玲瓏，稍稍開白烟。言  
昔太上皇，常居此祈年。風中聞清樂，往往來列仙。翠華  
入五雲，紫氣歸上玄。哀哀生人淚，泣盡弓劒前。聖道本  
自我，凡情徒顛然。小臣感玄化，一望青冥天。

步虛詞二首

阿母種桃雲海際，花落子城二千歲。海風吹折最繁枝，  
跪捧瓊槃獻天帝。

華表千年一鶴歸，凝丹為頂雪為衣。星星仙語人聽盡，

卻向五雲翻翅飛

桃源行

漁舟何招招浮在武陵水  
拖綸擲餌信流去誤入桃源  
行數里清源尋盡化綿綿  
躡花覓徑至洞前洞門蒼黑  
烟霧生暗行數步逢虛明  
俗人毛骨驚仙子爭來致詞  
何至此須臾皆破冰雪顏  
笑言委曲問人間因嗟隱身  
來種玉不知人世如風燭  
筵羞石髓勸客餐鐙熟松脂  
留客宿雞聲犬聲遙相聞  
曉光葱籠開五雲漁人振衣

起出戶滿庭無路花紛紛翻然恐迷鄉縣處一息不肯  
桃源住桃花滿溪水似鏡塵心如垢洗不去仙家一出  
尋無蹤至今水流山重重

魏宮詞二首

日晚長秋簾外報望陵歌舞在明朝漆鑪火欲熏衣麝  
憶得分時不忍燒

日映西陵松柏枝下臺相顧一相思朝來樂府長歌曲  
唱著君王自作詞



阿嬌怨

望見葳蕤舉翠華  
試開金屋掃庭花  
須臾宮女傳來信  
言幸平陽公主家

九華山并引

九華山在池州青陽縣西南九峯競秀神采奇異  
昔子仰太華以為此外無奇愛女几荆山以為此外無秀及  
今見九華始悼前言之容易也惜其地偏且遠不為世  
所稱故歌以大之

奇峯一見驚魂魄意想洪鑪始開闢疑是九龍天矯欲

攀天忽逢霹靂一聲化為石不然何至今悠悠億萬年

氣勢不死如騰仝

音審輕舉兒

雲含幽兮月添冷日凝輝兮

江漾影結根不得要路津迥秀長在無人境軒皇封禪

登云亭大禹會計臨東溟乘櫟

力追反山行具

不來廣樂絕獨

與猿鳥愁青熒君不見敬亭之山黃索漠兀如斷岸無

稜角宣城謝守一首詩遂使名聲齊五岳九華山九華

山自是造化一尤物焉能籍甚乎人間

送春曲

春向晚春思悠哉風雲日已改花葉自相催漠漠空  
中去何時天際來

春已暮冉冉如人老映葉見殘花連天是青草可憐桃  
與李從此同桑棗

春景去此去何時回遊人千萬恨落日上高臺寂寞繁  
花盡流鶯歸不來

初夏曲三首

銅壺方促夜斗柄暫南回稍嫌單衣重初憐北戶開西  
園花已盡新月為誰來

時節過繁華陰陰千萬家巢禽命子戲園果墜枝斜寂  
寞孤飛蝶窺叢覓晚花

綠水風初暖青林露早晞麥田雉朝雊桑野人莫歸百  
舌悲花盡無聲來去飛

柳花詞三首

開從綠條上散逐香風遠故取花落時悠揚占春晚

輕飛不假風輕落不委地  
撩亂舞晴空發人無限思  
晴天黯黯雪來送青春  
莫無意似多情千家萬家去

送春詞

昨來樓上迎春處今日登樓又送歸  
蘭蕊殘妝含露泣柳條長袖向風揮  
佳人對鏡容色改楚客臨江心事違  
萬古至今同此恨無如一醉盡忘機

秋詞二首

自古逢秋悲寂寥我言秋日勝春朝  
晴空一鶴排雲上

便引詩情到碧霄

山明水淨夜來霜  
數樹深紅出淺黃  
試上高樓清入骨  
豈知春色嗾人狂

劉賓客文集卷二十六

欽定四庫全書

劉賓客文集卷二十七

唐 劉禹錫 撰

樂府下

泰娘歌 并引

泰娘本韋尚書家主謳者初尚書為吳郡得之命樂工  
誨之琵琶使之歌且舞無幾何盡得其術居一二歲攜  
之以歸京師京師多新聲善工於是又捐去故技以新  
聲度曲而泰娘名字往往見稱於貴遊之間元和初尚



書薨於東京泰娘出居民間久之為蘄州刺史張繇所得其後繇坐事謫居武陵郡繇卒泰娘無所歸地荒且遠無有能知其容與藝者故日抱樂器而哭其音樵殺以悲雒客聞之為歌其事以續于樂府云

泰娘家本閭門西門前綠水環金隄有時妝成好天氣走上臯橋折花戲風流太守韋尚書路傍忽見停隼旟斗量明珠鳥傳意紺幘迎入專城居長鬟如雲衣似霧錦茵羅薦承輕步舞學驚鴻水榭春歌傳上客蘭堂莫

從郎西入帝城中貴遊簪組香簾櫳低鬟緩視抱明月  
纖指破撥生胡風繁華一旦有消歇題劒無光履聲絕  
洛陽舊宅生草萊杜陵蕭蕭松柏哀妝奩蟲網厚如繭  
博山爐側傾寒灰蘄州刺史張公子白馬新到銅駝里  
自言買笑擲黃金月墮雲中從此始安知鵬鳥坐隅飛  
寂寞旅魂招不歸秦嘉鏡有前時結韓壽香銷故篋衣  
山城少人江水碧斷雁哀猿風雨夕朱弦已絕為知音  
雲鬢未秋私自惜舉目風煙非舊時夢尋歸路多參差



如何將此千行淚更灑湘江斑竹枝

秋扇詞

莫道恩情無重來人間榮謝遞相催當時初入君懷袖  
豈念寒鑪有死灰

搗衣曲

爽砧應秋律繁杵含淒風一一遠相續家家音不同戶  
庭凝露清伴侶明月中長裾委襞積輕佩垂琤瓏汗餘  
衫更馥鈿移麝半空報寒驚邊雁促思聞候蟲天狼正

芒角虎落定相攻  
盈篋寄何處  
征人如轉蓬

七夕二首

河鼓靈旗動  
姮娥破鏡斜  
滿空天是幕  
徐轉斗為車  
機罷猶安石  
橋成不礙查  
寧知觀津女  
竟夕望雲涯  
天衢啓雲帳  
神馭上星橋  
初喜渡河漢  
頻驚轉斗杓  
餘霞張錦幃  
輕雷閃紅綃  
非是人間世  
還悲後會遙

龍陽縣歌

縣門白日無塵土  
百姓縣前挽魚罟  
主人引客登大隄

小人縱觀黃犬怒鷓鴣鳴遠籬落橘柚垂芳照窗戶  
沙平草綠見吏稀寂歷斜陽照懸鼓

度桂嶺歌

桂陽嶺下下復高高人稀鳥獸駭地遠草木豪寄言千  
金子知余歌者勞

插田歌并引

連州城下俯接村墟偶登郡樓適有所感遂書其事為  
俚歌以俟采詩者

岡頭花草齊燕子東西飛田塍望如線白水光參差農  
婦白紵裙農夫綠蓑衣齊唱田中歌嚶嚶如竹枝但聞  
怨響音不辨俚語詞時時一大笑此必相嘲嗤水平苗  
漠漠烟火生墟落黃犬往復還赤雞鳴且啄路傍誰家  
郎烏帽衫袖長自言上計吏年初離帝鄉田夫語計吏  
君家儂定諳一來長安罷眼大不相參計吏笑致辭長  
安真大處省門高軻我儂入無度數昨來補衛士唯用  
箇竹布君看二三年我作官人去

畬田作

何處好畬田團團縵山腹鑽龜得雨卦上山燒卧木驚  
麋走且顧羣雉聲咿喔紅燭遠成霞輕煤飛入郭風引  
上高岑獵獵度青林青林望靡靡赤光低復起照潭出  
老蛟爆竹驚山鬼夜色不見山孤明星漢間如星復如  
月俱逐曉風滅木從敲石光遂致烘天熱下種暖灰中  
乘陽圻牙孽蒼蒼一雨後蒼穎如雲發巴人拱手吟耕  
耨不關心由來得地勢徑寸有餘陰

蒲桃歌

野田生蒲桃纏繞一枝蒿移來碧墀下張王日日高分  
歧浩繁縟脩蔓蟠詰曲揚翹向庭柯意思如有屬為之  
立長架布濩當軒綠朱液漑其根理踈看滲漉繁葩組  
綬結懸實珠璣蹙馬乳帶輕霜龍鱗躍初旭有客冷陰  
至臨堂瞪雙目自言我晉人種此如種玉釀之成美酒  
令人飲不足為君博一斗往取涼州牧

鵲鵲吟



朝陽有吟鳳不聞千萬祀鵲鳩催衆芳晨間先入耳秋  
風白露晞從是爾啼時如何上春日唧唧滿庭飛

牆陰歌

白日左右浮天潢朝晡影入東西牆昔為兒童在陰戲  
當時意小覺日長東隣侯家吹笙簧隨陰促促移象牀  
西隣田舍乏糟糠就影汲汲舂黃粱因思九州四海外  
家家只占牆陰內莫言牆陰數尺間老卻主人如等閒  
君看眼前光景促中心莫學太行山

觀雲篇

興雲感陰氣疾走如見機晴來意態行有若功成歸葱  
籠含晚景潔白凝秋暉夜深度銀漢漠漠仙人衣

踏潮歌并引

元和十年夏五月終風駕濤南海羨溢南人曰踏潮也  
率三更歲一有之余為連州客或為予言其狀因歌之  
附于南越志

屯門積日無回颶滄波不歸成踏潮韞如鞭石矧且揺

亘空欲駕鼉鼉橋驚湍蹙縮悍而驕大陵高岸失岩堯  
四邊無阻音響調背負元氣掀重霄介鯨得性方逍遙  
仰鼻噓吸揚朱翹海人狂顧迭相招罽衣髻首聲曉曉  
征南將軍登麗譙赤旗指麾不敢囂翌日風回沴氣消  
歸濤納納景昭昭烏泥白沙復滿海海色不動如青瑤

### 百花行

長安百花時風景宜輕薄無人不沽酒何處不聞樂春  
風連夜動微雨陵曉濯紅燭出牆頭雪光映樓角繁紫

韻松竹遠黃遠籬落臨路不勝愁輕飛去何託滿庭芳  
魂魄照廡成丹渥爛熳喉顛狂飄零勸行樂時節易晚  
晚清陰覆池間唯有安石榴當軒慰寂寞

春有情篇

為問遊春侶春情何處尋花含欲語意草有闌生心雨  
頻催發色雲輕不作陰縱令無月夜芳興暗中深

路傍曲

南山宿雨晴春入鳳皇城處處聞弦管無非送酒聲

白鷺兒

白鷺兒最高格  
毛衣新成雪不敵  
衆禽喧呼獨凝寂  
孤眠芊芊草久立  
潺潺石前山正無  
雲飛去入遙碧

壯士行

陰風振寒郊  
猛虎正咆哮  
徐行出燒地  
連吼入黃茅  
壯士走馬去  
鎧前彎玉弣  
叱之使人立  
一發如鉞交  
悍睛忽星墮  
飛血濺林梢  
彪炳為我席  
羶腥充我庖  
里中欣害除  
賀酒紛號呶  
明日長橋上  
傾城看斬蛟

邊風行

邊馬蕭蕭鳴邊風滿磧生暗漆  
弓箭力半上鼓鼙聲襲  
月寒暈起吹雲陰陳成將軍占氣候出號夜翻營

一作安號

畏懼城

竹枝詞并引

四方之歌異音而同樂歲正月余來建平里中兒聯歌  
竹枝吹短笛擊鼓以赴節歌者揚袂睢舞以曲多為賢  
聆其音中黃鍾之羽卒章激訐如吳聲雖傖儻不可分

而含思宛轉有淇濮之豔昔屈原居沅湘間其民迎神  
詞多鄙陋乃為作九歌至于今荆楚鼓舞之故余亦作  
竹枝詞九篇俾善歌者颺之附于末後之聆已歛知變  
風之自焉

白帝城頭春草生白鹽山下蜀江清南人上來歌一曲  
北人莫上動鄉情

山桃紅花滿上頭蜀江春水拍山流花紅易衰似郎意  
水流無限似儂愁

江上朱樓新雨晴  
灤西春水縠文生  
橋東橋西好楊柳  
人來人去唱歌行

日出三竿春霧消  
江頭蜀客駐蘭橈  
憑寄狂夫書一紙  
住在成都萬里橋

兩岸山花似雪開  
家家春酒滿銀杯  
昭君坊中多女伴  
永安宮外蹋青來

城西門前灘瀕堆  
年年波浪不能摧  
懊惱人心不如石  
少時東去復西來



瞿唐嘈嘈十二灘此中道路古來難長恨人心不如水  
等閒平地起波瀾

巫峽蒼蒼烟雨時清猿啼在最高枝箇裏愁人腸自斷  
由來不是此聲悲

山上層層桃李花雲間烟火是人家銀釧金釵來負水  
長刀短笠去燒畬

楊柳枝詞九首

塞北梅花羌笛吹淮南桂樹小山詞請君莫奏前朝曲

聽唱新翻楊柳枝

南陌東城春蚤時相逢何處不依依  
桃紅李白皆誇好須得垂楊相發揮

鳳闕輕遮翡翠幃龍池遙望麴塵絲  
御溝春水相暉映狂殺長安年少兒

金谷園中鶯亂飛銅駝陌上好風吹  
城東桃李須臾盡爭似垂楊無限時

花萼樓前初種時美人樓上鬪腰支  
如今拋擲長街裏

露葉如啼欲恨誰

煬帝行宮汴水濱  
數株殘柳不勝春  
晚來風起花如雪  
飛入宮牆不見人

御陌青門拂地垂  
千條金縷萬條絲  
如今綰作同心結  
將贈行人知不知

城外春風吹酒旗  
行人揮袂日西時  
長安陌上無窮樹  
唯有垂楊管別離

輕盈嫋娜占年華  
舞榭妝樓處處遮  
春盡絮飛留不得

隨風好去落誰家

浪淘沙詞九首

九曲黃河萬里沙  
浪淘風簸自天涯  
如今直上銀河去  
同到牽牛織女家

洛水橋邊春日斜  
碧流輕淺見瓊砂  
無端陌上狂風急  
驚起鴛鴦出浪沙

汴水東流虎眼文  
清淮曉色鴨頭春  
君看渡口淘沙處  
渡卻人間多少人

鸚鵡舟頭浪颭沙青樓春望日將斜銜泥燕子爭歸舍  
獨自狂夫不憶家

濯錦江邊兩岸花春風吹浪正淘沙女郎剪下鴛鴦錦  
將向中流定晚霞

日照澄洲江霧開淘金女伴滿江隈美人首飾侯王印  
盡是沙中浪底來

八月濤聲吼地來頭高數丈觸山回須臾卻入海門去  
卷起沙堆似雪堆

莫道謔言如浪深莫言遷客似沙沈  
千淘萬灑雖辛苦  
吹盡狂沙始到金

流水淘沙不暫停前波未滅後波生  
令人忽憶瀟湘渚  
回唱迎神三兩聲

瀟湘神二首

湘水流湘水流九疑雲物至今愁  
君問二妃何處所零陵香草露中秋

斑竹枝斑竹枝淚痕點點寄相思  
楚客欲聽瑤瑟怨瀟

湘深夜月明時

拋毬樂詞二首

五絲繡團圓登君瑋筵最宜紅燭下偏稱落花前上  
客如先起應須贈一船

春蚤見花枝朝朝恨發遲及看花落後卻憶未開時幸  
有拋毬樂一栢君莫辭

楊柳枝詞二首

迎得春光先到來淺黃輕綠映樓臺只緣裊娜多情思

便被春風長請接

巫峽巫山楊柳多朝雲暮雨遠相和因想陽臺無限事  
為君回唱竹枝歌

竹枝詞二首


楊柳青青江水平聞郎江上唱歌聲東邊日出西邊雨  
道是無晴還有晴

楚水巴山江雨多巴人能唱本鄉歌今朝北客思歸去  
回入紇那披綠羅



紇那曲詞二首

楊柳鬱青青竹枝無限情周郎一回顧聽唱紇那聲  
蹋曲興無窮調同詞不同願郎千萬壽長作主人翁  
右已上詞先不入集伏緣播在樂章今附于卷末



劉賓客文集卷二十七

欽定四庫全書

集部

劉賓客文集卷

二十八至  
三十

詳校官監察御史

臣邱文愷

檢討臣何思鈞覆勘

總校官進士臣繆琪

校對官主事臣龔敬身

謄錄監生臣畢所諱

欽定四庫全書

劉賓客文集卷三十八

唐

劉禹錫 撰

送別四十六首

送工部張侍郎入蕃弔祭

時張兼修史

月窟賓諸夏雲霓降九天  
飾終隣好重錫命禮容全  
水咽猶登隴沙鳴稍極邊  
路因乘驛近志為飲冰堅  
毳帳差池見烏旗  
摇曳前歸來賜金石榮耀自編年

蚤秋送臺院楊侍御歸朝

兄弟四人遍歷諸科二人同在

仙署棣華春當時已絕倫今朝丹闕下更入白眉人重  
振高陽族分居要路津一門科第足五府辟書頻執鴈  
得秋氣法星懸火旻聖朝寰海靜所至不埋輪

送工部蕭郎中刑部李郎中並以本官兼中  
丞分命充京西京北覆糧使

霜簡映金章相輝同舍郎天威巡虎落星使出駕行尊  
組成全策京坻閱見糧歸來虜塵滅畫地奏明光

送李尚書鎮滑州

自浙西觀察徵拜兵部侍郎月餘有此拜

南徐報政入文昌東郡須才別建章  
視草名高同蜀客擁旄年少勝荀郎  
黃河一曲當城下緹騎千重照路傍  
自古相門還出相如今人望在巖廊

其後果繼章平之族

送渾大夫赴豐州

自大鴻臚拜家承舊勲

鳳銜新詔降恩華又見旌旗出渾家  
故吏來辭辛屬國精兵願逐李輕車  
韞裘君長迎風懼錦領首豪躡雪衙  
其奈明年好春日無人喚看牡丹花

送源中丞充新羅冊立使

侍中之孫

相門才子稱華簪持節東行捧德音身帶霜威辭鳳闕  
口傳天語到雞林煙開鼇背千尋碧日浴鯨波萬頃金  
想見扶桑受恩後一時西拜盡傾心

送陸侍御歸淮南使府五韻

用年字

江左重詩篇陸生名久傳鳳城來已熟羊酪不嫌羶歸  
路芙蓉府離堂瑇瑁筵秦山呈臘雪隋柳布新年曾忝  
揚州薦因君達短牋

時段丞相鎮揚州當辱表薦

送太常蕭博士棄官歸養赴東都

時元兄罷相為少師

仲兄為郎官  
並分司洛邑

兄弟盡駕鸞歸心切問安貪榮五采服遂挂兩梁冠侍  
膳曾調鼎循陔更握蘭從今別君後長向德星看

送王司馬之陝州

自太常丞  
授工為詩

暫輟清齋出太常空攜詩卷赴甘棠府公既有朝中舊  
司馬應容酒後狂案牘來時唯署字風煙入興便成章  
兩京大道多遊客每遇詞人戰一場

洛中送楊處厚入關便遊蜀謁韋令公

洛陽秋日正淒淒君去西秦更向西  
舊學三冬今轉富  
曾傷六翮養初齊  
王城曉入窺丹鳳  
蜀路晴來見碧雞  
蚤識卧龍應有分  
不妨從此躡丹梯

洛中逢韓七中丞之吳興口號五首

昔年意氣結羣英  
幾度朝回一字行  
海北天南零落盡  
兩人相見洛陽城

自從雲散各東西  
每日歡娛却慘悽  
離別苦多相見少  
一生心事在書題



今朝無意訴離愁，何況清弦急管催。  
本欲醉中輕遠別，不知翻引酒悲來。

駱駝橋上蘋風起，鸚鵡橋中箬下春。  
水碧山青知好處，開顏一笑向何人。

溪中士女出芭蘿，溪上鴛鴦避畫旗。  
何處人間似仙境，春山攜妓採茶時。

送周使君罷渝州歸郢州別墅

君思郢上吟歸去，故自渝南擲郡章。  
野戍岸邊留畫舸，

綠蘿陰下到山莊  
池荷雨後衣香起  
庭草春深綬帶長  
只恐鳴騶催上道  
不容待得晚松嘗

發華州留別張侍御

賈一作

東簡下延閣  
買符驅短轅  
同人惜分袂  
結念醉芳樽  
切別弦思蕭蕭征騎煩  
臨歧無限意相視却忘言

張詩云夫

子生知者相期妙理中遂有忘言之句

奉送家兄歸王屋山隱居二首

據道書王屋山一名陽洛

山

陽洛天壇上依稀似玉京夜分先見日月淨遠聞笙雲  
路將雞犬丹臺有姓名古來成道者兄弟亦同行

春來山事好歸去憶逍遙水淨苔莎色露香芝朮苗登  
臺吸瑞景飛步翼神飈願薦瓊窰曲相將學玉簫

送王師魯協律赴湖南使幕

即永穆  
公之孫

翩翩馬上郎驅傳渡三湘橘樹沙洲暗松醪酒肆香素  
風傳竹帛高價騁琳琅楚水多蘭若何人事蹇芳

別友人後得書因以詩贈

前時送君去揮手青門橋路轉不相見猶聞馬蕭蕭今  
得出關書行塵日已遙春還遲君至共結芳蘭苕

奉送浙西李僕射相公赴鎮

奉送至臨泉驛  
書禮見徵拙詩

時在  
汝州

建節東行是舊遊歡聲喜氣滿吳州郡人重得黃丞相  
童子爭迎郭細侯詔下初辭溫室樹夢中先到景陽樓  
自憐不識平津閣遙望旌旗汝水頭

重送浙西李相公頃廉問江南已經七載後

歷滑臺劍南兩鎮遂入相今復領舊地新  
加旌旄

江北萬人看玉節江南千騎引金鐙鳳從池上游滄海  
鶴到遼東識舊巢城下清波含百谷憲中遠岫列三茅  
碧雞白馬回翔久却憶朱方是樂郊

送華陰尉張若赴邕府使幕

張即燕公之  
孫坐事除名

昔忝南宮郎往來東觀頻嘗披燕文傳聳若窺三辰翊  
聖崇國本保賢正朝倫高視緬今古清風賈無鄰蘭錡

照通衢一家十朱輪  
鄴國嗣侯絕為鄉  
貴業貧夫子承  
大名少年振芳塵  
青袍仙掌下  
矯首陵煙旻  
公治本非  
罪潘郎一為民  
風霜苦搖落  
堅白無緇磷  
一旦逢良時  
天光燭幽淪  
重為長裾客  
佐彼觀風臣  
分野窮禹畫  
人煙過虞巡  
不言此行遠  
所樂相知新  
雨起巫山陽  
鳥鳴湘水濱  
離筵出蒼莽  
別曲多愁辛  
今朝一樽酒  
明日千里人  
彼此孤舟去  
悠悠天海春

送湘陽熊判官孺登府罷歸鍾陵因寄呈江

西裴中丞二十三兄

射策志未就從事府云除篋留馬卿賦袖有劉弘書忽  
見夏木深悵然憶吾廬復持州民刺歸謁專城居君家  
誠易知勝絕傾里閭人言北郭生門有卿相輿鍾陵藹  
千里帶郭西江水朱檻照河宮旗亭綠雲裏前年初缺  
守慎簡由宸扆臨軒弄郡章得人方付此是時左馮翊  
天下第一理貴臣持牙璋優詔發青紙迎風汚吏免先  
令疲人喜何武効腐儒陳蕃禮高士昔升君子堂腰下

綬猶黃

中丞時為萬年尉

汾陰有寶氣赤堇多奇鉉東簡下曲

臺佩韃來歷陽綺筵陪一笑蘭室襲餘芳風水忽異勢

江湖遂相忘因君儻借問為話老滄浪

中丞為博士製相國柳宜城諡

議識者選之頃授予以其本厥後牧和州節度使杜司徒以中丞材譽俱高欲令軍裝以重戎府故授以本州團練使滿坐觀腰韃禮成驪甚相視而笑後房燕樂卜夜縱談予忝司徒之賓時獲末坐初中丞自尚書屯田員外郎出守踵其武者今給事中穆公代給事者右丞段公予不佞繼右丞之後故曰襲餘芳焉

送韋秀才道沖赴制舉

驚禽一辭巢棲息無少安秋扇一離手流塵散霜紉故



侶不可追涼風日已寒遠逢杜陵士別盡平生歡逐客  
無印綬楚江多芷蘭因君時暇遊長歛不復彈閱書南  
軒霽絙瑟清夜闌萬境外寂一枯腹中寬伊昔玄宗  
朝冬卿冠駕鸞蕭穆升內殿從容領儒冠游夏無措詞  
陽秋垂不刊至今羣玉府學者空縱觀世人希德門揭  
若攀峯巒之子向明訓鏘如振琅玕一旦西上書斑裳  
拂征鞍荆臺宿暮雨漢水浮春瀾君門起天中多士如  
星攢烟霞覆雙闕抃舞羅千官清漏滴銅壺仙厨下雕

盤煒煌仰金榜錯落飛濡翰古來長策人所歎遭時難  
一鳴從此始相望青雲端

送李策秀才還湖南因寄幕中親故兼簡衡

州呂八郎中

深春風日淨爭長幽鳥鳴僕夫前致辭門有白面生攝  
衣相問訊解帶坐南榮端志見眉睫苦言發精誠因出  
懷中文調孤詞亦清悄如促柱弦掩抑多不平乃言本  
蜀士世降岷山靈前人秉懿文高視來上京曳綬司徒

府所從信國楨析薪委空林善響難繼聲何處弱附郭  
幾人思邵城雲天望喬木風水悲流萍前與計吏西始  
列貢士名森然就筆札從試春官卿帝城岐路多萬足  
伺晨星茫茫風塵中工拙同有營寒女勞夜織山苗榮  
寸莖侯門方擊鍾衣褐誰將迎弱羽果摧頽壯心鬱悵  
悵諒無蟠木容聊復蓬累行昨日訊靈龜繇言利艱貞  
當求捨拔中必在審已明誓將息薄遊焦思窮筆精時  
蘭在幽渚安得揚葦馨曰余摧落者散質負華纓一聆

苦辛詞再動伊鬱情身棄言不重愛才心尚驚恨無羊  
角風使爾化北溟論罷情益親涉旬忘歸程日攜邑中  
客閒眺江上城晝渴命金壘宵談轉璿衡蕙風香塵尾  
月露濡桃笙忽被戒羸驂薄言事南征火雲尉千里旅  
思浩已盈湘江含碧虛衡嶺浮翠晶宜伊山水異適與  
人事并油幕似鳬丘粲然疊瑤瓊庾樓見清月孔坐多  
綠醺復有衡山守本自雲龍庭至和在靈府發越侔咸  
英一麾出營陽惠彼噉噉氓隼旗辭瀟水居者皆涕零

惟昔與伊人交歡在夙齡一從雲雨散滋我鄙悵萌北  
渚不堪愁南音誰復聽離憂若去水浩漾無時停嘗聞  
祝融峯上有神禹銘古石琅玕姿祕文螭虎形聖功奠  
遠服神物擁休禎賢人在其下仿佛疑蓬瀛君行歷郡  
齋大袂拂雙旌飾容遇朗鑒肝鬲可以呈昔日馬相如  
臨卭坐盡傾勉君刷羽翰蚤取凌青冥

送張盥赴舉并引

古人以偕受學為同門友今人以偕升名為同年友其

語熟見搢紳者皆道焉余於張盥為丈人由是道也曩  
吾見爾之始生以老成為祝今吾見爾之成人以未立  
為憂吾不幸嚮所謂同年友當其盛時聯袂齊鑣亘絕  
九衢若屏風然今來落落如曙星之相望借曰會合不  
煩異席可長太息哉然而尚書右丞衛大受兵部侍郎  
武庭碩二君者當時偉人咸萬夫之望足以訂十朋之  
多也第如京師無騷騷爾無忤忤爾時秋也吾為若叩  
商之謳幸有感夫二君子

爾生始懸弧我作坐上賓引箸舉湯餅祝詞天麒麟今  
成一丈夫坎軻愁風塵長裾來謁我自號廬山人道舊  
與撫孤悄然傷我神依依見眉睫嘿嘿含悲辛永懷后  
年友追想出谷晨三十二君子齊飛陵烟旻曲江一會  
時後會已彫淪況今三十載閱世難重陳盛時一已過  
來者日日新不如搖落樹重有明年春火後見琮璫霜  
餘識松筠肅機乃獨秀武部亦絕倫爾今持我詩西見  
二重臣成賢必念舊保貴在安貧清時為丞郎氣力侔

陶鈞乞取斗升水因之雲漢津

送裴處士應制舉

并引

晉人裴昌禹讀書數千卷於周官小戴禮尤邃性是古  
敢言雖侯王不能卑下故與世相參差凡抵有位以索  
合行天下幾

戶依反

遍常歎諸侯莫可遊欲一見天子而

未有路會今年詔書徵賢良昌禹大喜以為盡可以豁  
平生搏髀爵躍曰一觀雲龍庭足矣繇是裹三月糧而  
西徂咨余以七言為西遊之資藉耳



裴生久在風塵裏氣勁言高少知己注書曾學鄭司農  
歷國多於孔夫子往年訪我到連州無窮絕境終日遊  
登山雨中試蠟屐入洞夏裏披貂裘白帝城邊又相遇  
斂翼三年不飛去忽然結束如秋蓬自稱對策明光宮  
人言策中說何事掉頭不荅看飛鴻彤庭翠松迎曉日  
鳳銜金榜雲間出中貴腰鞭立傾酒宰臣委佩觀搖筆  
古稱射策如彎弧一發偶中何時無由來草澤無忌諱  
努力滿挽當雲衢憶得童年識君處嘉禾驛後睽牆住

垂鈎鬪得王餘魚，蹋芳共登蘇小墓。此事今同夢想間，相看一笑且開顏。老大希逢舊鄰里，為君扶病到方山。

和州送錢侍御自宣州幕拜官便於華州觀省

五綵繡衣裳，當年正相稱。春風舊關路，歸去真多興。蘭陔行可採，蓮府猶回瞪。楊家紺幘迎，侍御即王相公貴壻謝守瑤。

華贈

宣州崔相公  
有詩贈行

御街草泛濫，臺栢烟含凝。曾是平昔

遊，無因理歸乘。

將赴汝州途出浚下留辭李相公

長安舊遊四十載，鄂渚一別十四年。  
後來富貴已零落，歲寒松柏猶依然。  
初逢貞元尚文主，雲闕天池共翔舞。  
相看却數六朝臣，屈指如今無四五。  
夷門天下之咽喉，昔時往往生瘡疣。  
聯翩舊相來鎮壓，四海吐納皆通流。  
久別凡經幾多事，何由說得平生意。  
千思萬慮盡如空，一笑一言真可貴。  
世間何事最殷勤，白頭將相逢故人。  
功成名遂會歸老，請向東山為近隣。

送令狐相公自僕射出鎮南梁

夏木正陰成戎裝出帝京  
沾襟辭闕淚回首別鄉情  
雲樹襄中路風烟漢上城  
前旌轉谷去後騎蹋橋聲  
久領駕行重無嫌虎綬輕  
終當提一筆再入副蒼生

送趙中丞自司金外郎轉官參山南令狐僕

射幕府

趙氏兄弟皆僕射門客

綠樹滿襄斜西南蜀路賒  
驛門臨白社縣道過黃花  
相府開油幕門生逐絳紗  
行看布政後還從入京華

奉送裴司徒令公自東都留守再命太原

本封

晉國公兩任

相去十六年

星使出關東兵符賜上公山河歸舊國管籥換離宮行  
色旌旗動軍聲鼓角雄愛棠餘故吏騎竹見新童漢壘  
三秋靜邊塵萬里空其如天下望旦夕詠清風

奉送李戶部侍郎自河南尹再除本官歸闕

昔年內署振雄詞今日東都結去思宮女猶傳洞簫賦  
國人先詠衮衣詩華星却復文昌位別鶴重歸太一池

想到金門待通籍一時驚喜見風儀

送蘄州李郎中赴任

楚關蘄水路非賒東望雲山日夕佳  
薤葉照人呈夏簾  
松花滿盃試新茶  
樓中飲興因明月  
江上詩情為晚霞  
北地交親長引領  
蚤將玄鬢到京華

洛中春末送杜錄事赴蘄州

尊前花下長相見  
明日忽為千里人  
君過午橋回首望  
洛城猶自有殘春

夜宴福建盧侍御宅因送之鎮

暫駐旌旗洛水隄，綺筵紅燭醉蘭闥。  
美人美酒長相逐，莫怕猿聲發建溪。

洛中送崔司業使君扶持赴唐州

綠野方城路，殘春柳絮飛。  
風鳴驪驪馬，日照老萊衣。  
洛苑魚書至，江村雁戶歸。  
相思望淮水，雙鯉不應稀。

送河南皇甫少尹赴絳州

祖帳臨周道，前旌指晉城。  
午橋羣吏散，亥字老人迎。  
詩

酒同行樂別離方見情從茲洛陽社吟詠欠書生

送前進士蔡京赴學究科

時舊相楊尚書掌選

耳聞戰鼓帶經鋤振發名聲自里閭已是世間能賦客  
更攻憲下絕編書朱門達者誰能識絳帳諸生盡不如  
幸遇天官舊丞相知君無翼上空虛

送唐舍人出鎮閩中

暫辭鴛鴦出蓬瀛忽擁貔貅鎮粵城閩嶺夏雲迎皂蓋  
建溪秋樹映紅旌山川遠地由來好富貴當年別有情



了却人間婚嫁事復歸朝右作公卿

送盧處士歸嵩山別業

世業嵩山隱雲深無四鄰藥鑪燒姹女酒甕貯賢人曉  
日華陰霧秋風函谷塵送君從此去鈴閣少談賓

送李友路秀才赴舉

誰憐相門子不語望秋山生長紈綺內辛勤筆硯間榮  
親在名字好學棄官班佇俟明年桂高堂開笑顏

送國子令狐博士赴興元覲省

相門才子高陽族學省清資五品官諫院過時榮棣萼  
謝庭歸去蹋芝蘭山頭花帶烟嵐晚棧底江涵雪水寒  
伯仲到家人盡賀柳營蓮府遞相歡

送李二十九兄員外赴邠寧使幕

家襲韋平身業文素風清白至今貧南宮通籍新郎吏  
西候從戎舊主人城外草黃秋有雪烽頭煙靜虜無塵  
鼎門為別霜天晚賸把離觴三五巡

送分司陳郎祗召直史館重修三聖實錄

蟬鳴官樹引行車言自成周赴玉除遠取南朝貴公子  
重修東觀帝王書常時載筆窺金匱暇日登樓到石渠  
若問舊人劉子政如今頭白在商於

送李中丞赴楚州

緹騎朱旗入楚城士林皆賀振家聲兒童但喜迎賢守  
故吏猶應記小名萬頃水田連郭秀四時煙月映淮清  
憶君初得崑山玉同向揚州攜手行

送李庾先輩赴選

卷二十八  
一家何啻十朱輪諸父雙飛秉大鈞曾脫素衣參幕客  
却為精舍讀書人離筵洛水侵栢色征路函關向晚塵  
今日山公舊賓主知君不負帝城春

送廖參謀東遊二首

九陌逢君又別離行雲別鶴本無期望嵩樓上忽相見  
看過花開花落時

繁花落盡君辭去綠草垂楊引征路東道諸侯皆故人  
留連必是多情處

送從弟郎中赴浙西

并引

從弟三復十餘年間凡三為浙右從事往年王公入相  
薦敷登朝中復從公鎮南未幾而罷昨以尚書外郎奉  
使至洛旋承新命改轅而東三從公皆在舊地徵諸故  
事負無其倫故賦詩贈之以志異也

銜命出尚書新恩換使車漢庭無右者梁苑重歸歟又

食建業水曾依京口居

劉前軍傳云本  
舊人世家京口

共經何限事賓

主兩如初

劉賓客文集卷二十八

欽定四庫全書

劉賓客文集卷二十九

唐 劉禹錫 撰

送僧二十四首

贈別君素上人 并引

曩子習禮之中庸至不勉而中不思而得惛然知聖人之德學以至於無學然而斯言也猶示行者以室廬之奧耳求其徑術以布武未易得也晚讀佛書見大雄念物之普級寶山而梯之高揭慧火巧鎔惡見廣疎便門

旁求邪徑其所證入如舟沿川未始念於前而日遠矣  
夫何勉而思之邪是余知寔音與於中庸啓鍵關於內  
典會而歸之猶初心也不知予者謂予困而後援佛謂  
道有二焉夫悟不因人在心而已其證也猶暗人之享  
太牢信知其味而不能形於言以聞于耳也口耳之間  
兼寸耳尚不可使聞它人之不吾知宜矣開士君素偶  
得予於所親一麻棲草千里來訪素以道眼視予予以  
所視視之不由陞級攜手智地居數日告有得而行乃



為詩以見志云

窮巷唯秋草高僧獨扣門相歡如舊識問法到無言水  
為風生浪珠非塵可昏去來皆是道此別不銷魂

送深法師遊南岳

上人本在  
資聖寺

師在白雲鄉名登善法堂十方傳句偈八部會壇場飛  
錫無定所寶書留舊房唯應銜草雁相送至衡陽

廣宣上人寄在蜀與韋令公唱和詩卷因以

令公手札答詩示之

碧雲佳句久傳芳，曾向成都住草堂。  
振錫常過長者室，披文猶帶令公香。  
一時風景添詩思，八部人天入道場。  
若許相期同結社，吾家本自有柴桑。

送僧仲制東遊兼寄呈靈澈上人

釋子道成神氣閑，住持曾上清涼山。  
晴空禮拜見真像，金毛五髻卿雲間。  
西遊長安隸僧籍，本是門前曲江碧。  
松間白日照寶書，竹下香泉灑瑤席。  
前時學得經綸成，奔馳象馬開禪局。  
高筵談柄一麾拂，講下聽徒如醉醒。

舊聞南方多長老次第來入荆門道荆州本自重彌天  
南朝塔廟猶依然宴坐東陽枯樹下經行居止故臺邊  
忽憶遺民社中客為我衡陽駐飛錫講罷同尋相鶴經  
閑來共蠟登山屐一旦揚眉望沃州自言王謝許同遊  
憑將雜擬三十首寄與江南湯慧休

送僧元暲南遊并引

予策名二十年百慮而無一得然後知世所謂道無非  
畏途唯出世間法可盡心耳繇是在席硯者多旁行胡

反四句之書備將迎者皆赤顏白足之侶采入智地靜  
通還源客塵觀盡妙氣來宅內視胸中猶煎鍊然開士  
元嵩姓陶氏本丹陽居家世有人爵不藉其資於毗尼  
禪那極細牢之義於中後日習總持之門妙音奮迅願  
力昭荅雅聞子事佛而佞巫來相從或問師隱形之自  
對曰小失怙恃推棘心以求上乘積四十年有羸老將  
至而不懈始悲浚泉之有冽今痛防墓之未遷塗芻莫  
備薪火恐滅諸相皆離此心長懸雖萬性歸佛盡為釋

種如何入海無復水名然其一切智者豈遺百行求無  
量義者寧容斷思今聞南諸侯雅多大士思扣以苦調  
而希其末光無容至前有足悲者予聞是說已力不足  
而悲有餘因為詩以送之庶乎踐霜露者聆之有惻  
寶書翻譯學初成振錫如飛白足輕彭澤因家凡幾世  
靈山預會是前生傳鐙已悟無為理濡露猶懷罔極情  
從此多逢大居士何人不願解珠璣

送如智法師遊辰州兼寄許評事

前日過蕭寺看師上講筵都人禮白足施者散金錢方便無非教經行不廢禪還知習居士發論達彌天

贈長沙讚頭陀

外道邪山千萬重真言一發盡摧峯有時明月無人夜獨向昭潭制惡龍

送慧則法師上都因呈廣宣上人

并引師精  
淨名經

佛示滅後大弟子演聖言而成經傳心印曰法承法而能專曰宗由宗而分教曰友坐而攝化者勝義皆空之

宗也行而宣教者摧破邪山之友也釋子慧則生於像  
季思濟劫濁乃學於一友開彼羣迷以為盡妙理者莫  
如法門夔凡夫者莫如佛土悟無染者莫如散花故業  
于淨名深達實相自京師涉漢沔歷鄢郢登熊湘聽徒  
百千耳感心化法無住道行而歸顧予有社內之因故  
言別之日愛緣瞥起時也秋盡詠江淹雜擬以送之前  
見宣上人為我多謝

昨日東林看講時都人象馬踴瑠璃雪山童子應前世

金粟如來是本師一錫言歸九城路三衣曾拂萬年枝  
休公久別如相問楚客逢秋心更悲

秋日過鴻舉法師寺院便送歸江陵并引

梵言沙門猶華言去欲也能離欲則方寸地虛虛而萬  
景入入必有所泄乃形乎詞詞妙而深者必依于聲律  
故自近古而降釋子以詩聞于世者相踵焉因定而得  
境故翛然以清由慧而遣詞故粹然以麗信禪林之臨  
粵而誠河之珠璣耳初鴻舉學詩於荆郢間私試竊詠



發於餘習蓋榛楛之翠羽弋者未之眄焉今年至武陵  
二千石始竒之有起予之歎以方袍親絳紗者十有餘  
旬繇是名稍聞而藝愈變閏八月余步出城東門謁仁  
祠而鴻舉在焉與之言移時因告以將去且曰貧道雅  
聞東諸侯之工為詩者莫若武陵今幸承其話言如得  
法印寶山之下宜有所持豈徒衣襪之中衆花而已余  
聞是說乃叩商而吟成一章章八句郡守以坐嘯餘詠  
激清徵而應之師其行乎足以資一時中之學矣

看畫長廊遍尋僧一徑幽小池兼鶴淨古木帶蟬秋客  
至茶煙起禽歸講席收浮杯明日去相望水悠悠

重送鴻舉赴江陵謁馬逢侍御

西北秋風彫蕙蘭洞庭波上碧雲寒茂陵才子江陵住  
乞取新詩合掌看

送僧方及南謁柳員外并引

九江僧方及既出家依屺山一時中頗屬詩以攄思古  
詩人暨今號為能賦有輒求其詞吟呻之拳拳然多多

益嗜影不出山者十年常登最高峯四望天海沖然有  
遠遊之志頓錫而言曰神馳而形闕者方內之徒及吾  
無方間於何者繇是耳得必目探之意行必身隨之雲  
遊鳥公虛筵反無迹而遠予為連州居無何而方及至出  
械中詩一篇以貺予其詞甚富留一歲觀其行結矩如  
教益多之一旦以行日來告且曰雅聞鳥味之下有賢  
諸侯願躋其門如蹈十地敢乞詞以抵之予唯而賦顧  
其有重請之色起於顏間耳



昔事廬山遠精舍虎溪東朝陽照瀑水樓閣虹霓中騁  
望羨游雲振衣若秋蓬舊房閉松月遠思吟江風古寺  
歷頭陀奇峯攀祝融南登小桂嶺卻望歸塞鴻衣祴貯  
文章自言學雕蟲搶榆念陵厲覆篋圖宮崇遠郡多暇  
日有詩訪禪宮石門聳峭絕竹院含空濛幽響滴巖溜  
晴芳飄野叢海雲懸颶母山果屬狙公忽憶吳興郡白  
蘋正惹龍願言挹風采邈若窺華嵩桂水夏瀾急火山  
宵焰紅三衣濡菡露一錫飛煙空勿謂翻譯徒不為文

雅雄古來賞音者推龔得孤桐

按祖公宜斥賦茅者而越絕書有猿公張衡賦

南都有猿父長嘯之句古文士又云權父繇是而言謂猿為父舊矣

### 贈日本僧智藏

浮楫萬里過滄溟遍禮名山適性靈深夜降龍潭水黑  
新秋放鶴野田青身無彼我那懷土心會真如不讀經  
為問中華學道者幾人雄猛得寧馨

### 贈眼醫婆羅門僧

三秋傷望遠終日泣途窮兩目今先暗中年似老翁看

朱漸成碧羞日不禁風師有金篦術如何為發蒙

海陽湖別浩初師并引

瀟湘間無土山無濁水民乘是氣往往清慧而文長沙  
人浩初生既因地而清矣故去葷洗慮剔顛毛而壞其  
衣居一都之殷易與士會得執外教盡捐苛禮自公侯  
守相必賜其清問耳目灌注習浮於性而里中兒賢適  
與浩初比者嬰冠帶豢妻子吏得以乘陵之汨沒天慧  
不得自奮莫可望浩初之清光於侯門上坐第自吟羨

而已浩初益自多其術尤勇於近達者而歸之往年之  
臨賀唁侍郎楊公留歲餘公遺以七言詩手筆于素前  
年省柳儀曹于龍城又為賦三篇皆章書今復來連山  
以前所得雙南金出於緘亟請余賡之按師為詩頗清  
而奕棋至第三品二道皆足以取幸於士大夫宜薰餘  
習以深入也會吳郡以山水冠世海陽又以奇甲一州  
師慕道於泉石宜篤故攜之以嬉及言旋復引與共載  
於湖上奕於樹石間以植沃州之因緣且賦詩具道其

事

近郭有殊境獨遊常鮮懽逢君駐緇錫觀白稱林壑湖  
滿景方霽野香春未闌愛泉移席近聞石輟棋看風止  
松猶韻花繁露晚乾橋形出樹曲巖影落池寒湘東架  
險凡四  
橋山下出泉逗品為池泓澄可愛  
者不可遍舉故狀其境以貽好事別路千嶂裏詩情莫  
雲端它年買山處似此得隳官

觀棋歌送僊師西遊

長沙男子東林師閒讀藝經工奕棋有時凝思如入定



暗覆一局誰能知今年訪余來小桂方袍袖中貯新勢  
山城無事愁日長白晝慵慵眠匡牀因君臨局看鬪智  
不覺遲景沈西牆自從山人遇樵子直到開元王長史  
前身後身付餘習百變千化無窮已初疑磊落曙天星  
次見搏擊三秋兵雁行布陳衆未曉虎穴得子人皆驚  
行盡三湘不逢敵終日饒人損機格自言臺閣有知音  
悠然遠起西遊心南山夏木陰寂寂好處裴裏駐飛錫  
忽思爭道畫平沙獨笑無言心有適藹藹京城在九天

貴遊豪士足華筵此時一行出人意賭取聲名不要錢

贈別約師并引

荊州人文約市井生而雲鶴性故去輦為浮圖生寤而證入與南抵六祖始生之墟得遺教甚悉今年訪余于連州且曰貧道昔浮湘川會柳儀曹謫零陵宅于佛寺幸聯棟而居者有年繇是時人大士得落耳界夫聞為見因今日之來曩時之因耳時儀曹牧柳州與八句贈別

師逢吳興守相伴住禪扃春雨同栽樹秋鐙對講經  
廬山曾結社桂水遠揚舲話舊還惆悵天南望柳星

送鴻舉師江南并引

始余謫朗州爾時是師振麻衣斐然而前持文篇以為  
僧贄唧唧而清如蟲吟秋自然之響無有假合有足佳  
者故為賦二章以聲之距今年過于建平赤頓益蕃文  
思益深而內外學益富既訊已探緘中出前所與詩閱  
之紙勞墨瘁與我同來因思夫苒苒之光渾渾之輪時

而言有初中後之分日而言有今昨明之稱身而言有  
幼壯艾之期乃至一磬欬一彈指中際皆具何必求三  
生以異身邪然而視余之丈昔與今有莛楹之別視余  
之書昔與今有鈞石之懸視余之仕昔與今乃唯阿之  
差耳豈有工拙之數存乎其間哉蓋可勉而進者與日  
月而至矣彼儻來外物雖日月無能至焉是歲師告余  
遊江西復為賦七言以為遊地爾

禪客學禪兼學文出山初似無心雲從風卷舒來處處

繚繞巴山不得去  
山州古寺好閒居  
讀盡龍王官裏書  
使君灘頭揀石硯  
白帝城邊尋野蔬  
忽然登高心瞥起  
又欲浮楫信流水  
烟波浩淼魚鳥情  
東去三千三百里  
荆門硤斷無盤渦  
湘平漢濶清光多  
廬山霧開見瀑布  
江西月淨聞漁歌  
鍾陵八部多名守  
半是西方社中友  
與師相見便談空  
想得高齋獅子吼

送霄韻上人遊天台

曲江僧向松江見  
又道天台看石橋  
鶴戀故巢雲戀岫

比君猶自不逍遙

送義舟師卻還黔南并引

黔之鄉在秦楚為爭地近世人多過言其幽荒以談笑聞者又從而張皇之猶夫東瀛逐原燎或近乎語妖適有沙門義舟道黔江而來能畫地為山川及條其風俗纖悉可信且曰貧道以一錫遊它方衆矣至黔而不知其遠始遇前節使而聞今節使益賢而文故其佐多才士摩園之下曳裾秉筆彬然與兔園同風蕃僧以外學

嗜篇章時或攝衣為末至客其來也約主人乘秋風而  
還今乞詞以颺之如捧意珠行住坐卧知相好耳余曰  
唯命筆為七言以應之

黔江秋水浸雲霓獨泛慈航路不迷猿狖窺齋林葉動  
蛟龍聞呪浪花低如蓮半偈心常悟問菊新詩手自攜  
常說摩圍似靈鷲卻將山屐上丹梯

送景玄師東歸

并引

廬山僧景玄袖詩一軸來謁往往有句輕而道如鶴雛

襁褓未有六翮而步舒視遠憂然一嘆乃非泥滓間物  
獻詩已斂衽而辭且曰其來也與故山秋為期夫丐者  
僧事也今無它請唯文是求故賦一篇以代瓔珞耳

東林寺裏一沙彌心愛當時才子詩山下偶隨流水出  
秋來卻赴白雲期灘頭躡屐挑沙菜路上停舟讀古碑  
想到舊房拋錫杖小松應有過檐枝

送元曉上人歸稽亭

重疊稽亭路山僧歸獨行遠峯斜日影本寺舊鐘聲徒



侶問新事烟雲含別情應誇乞食處蹋遍鳳凰城

送惟良上人并引

以貌窺天者曰乾然健單于然而高以數迎天者曰其  
用四十有九天果以有形而不能脫乎數立象以推爻  
既成而遺之古所謂神交造物者非空言耳軒皇受天  
命其佐皆聖人故得之惟唐繼天德如黃帝有外臣一  
行亦聖之徒與刊歷考元書成化去今丹徒人惟良生  
而能知非自外求以乾坤之莢當十期之數凝神運指

上感躍次視玄黃溟滓無倪有常絕機泯知獨以神會  
數起於復之初九音生乎黃鍾之宮積微本隱言與化  
合夫天人之數極而含變變而靡不通神趨鬼懼不足  
駭也惟良得一行之道故亦慕其為外臣謬謂余為世  
間聰明子子來訪初以說合至于不言言息而理冥復  
申之以嗟歎曰師其庶幾乎信神與之而不能測神之  
所以付信術通之而不能知術之所以淺哉余聞乎曾  
井蛙醯雞之不若也長慶四年冬十一月甲子語至夜

艾遂為詩以志焉

高齋灑寒水是夕山僧至玄牝無關鎖瓊書捨文字鐙  
明香滿室月午霜凝地語到不言時世間人盡睡

送元簡上人適越

孤雲出岫本無依勝境名山即是歸久向吳門遊好寺  
還思越水洗塵機浙江濤驚師子吼稽嶺峯疑靈鷲飛  
更入天台石橋路垂珠璀璨拂三衣

送宗密上人歸南山草堂寺因詣河南尹白

侍郎

宿習脩來得慧根多聞第一卻忘言自從七祖傳心印  
不要三乘入便門東泛滄江尋古跡西歸紫閣出塵喧  
河南白尹大檀越好把真經相對翻

劉賓客文集卷二十九

欽定四庫全書

劉賓客文集卷三十

唐 劉禹錫 撰

哀挽悲傷三十八首

德宗神武孝文皇帝挽歌二首

出震清多難乘時播大鈞操弦調六氣揮翰動三辰運  
偶升天日哀深率土人瑤池無轍跡誰見屬車塵

鳳翥擁銘旌威遲異吉行漢儀陳祕器楚挽咽繁聲駐  
綽辭清廟凝笳背直城唯應留內傳知是向蓬瀛

敬宗睿武昭愍孝皇帝挽歌三首

寶歷方無限仙期忽有涯  
事親崇漢禮傳聖法殷家  
晚出芙蓉闕春歸棠棣華  
玉輪今日動不是畫雲車

任賢勞夢寐登位富春秋  
欲逐東人幸寧虞杞國憂  
長楊牧羽騎太液泊龍舟  
唯有衣冠在年年愴月遊

講學金華殿親耕鉤盾田  
侍臣容諫獵方士信求仙  
虹影俄侵日龍輿不上天  
空餘水銀海長照夜鐙前

文宗元聖昭獻孝皇帝挽歌三首

繼體三才理承顏九族親禹功留海內殷歷付天倫調  
露曲長在秋風詞尚新本支方百代先讓棟華春  
月落宮車動風淒儀仗閒路唯瞻鳳翼人尚想龍顏御  
宇方無事乘雲遂不還聖情悲望處兄日下西山  
享國十五載升天千萬年龍鑣仙路遠騎吹禮容全日  
下初陵外人悲舊劍前周南有遺老掩淚望秦川

故相國燕國公于司空挽歌二首

彤弓封舊國黑綃繼前功十年鎮南雍九命作司空池

臺樂事盡簫鼓葬儀雄一代英豪氣曉散白楊風  
陰山貴公子來塋五陵西前馬悲無主猶帶朔風嘶漢  
水青山郭襄陽白銅蹄至今有遺愛日暮人悽悽

重至衡陽傷柳儀曹并引

元和乙未歲與故人柳子厚臨湘水為別柳浮舟適柳  
州余登陸赴連州後五年余從故道出桂嶺至前別處  
而君沒於南中因賦詩以投弔

憶昨與故人湘江岸頭別我馬映林嘶君飄轉山滅馬



嘶循故道飄滅如流電千里江蘼春故人今不見

謫居悼往二首

邑邑何邑邑長沙地卑濕樓上見春多花前恨風急猿  
愁腸斷叫鶴病翹趾立牛衣獨自眠誰哀仲卿泣

鬱鬱何鬱鬱長安遠於日終日念鄉關燕來鴻復還潘  
岳歲寒思屈平顛顛顏殷勤望歸路無雨即登山

哭呂衡州時余方謫居

一夜霜風彫玉芝蒼生望絕士林悲空懷濟世安人略

不見男婚女嫁時遺草一函歸太史旅墳三尺近要離  
朔方徙歲行當滿欲為君刊第二碑

遥傷段右丞

江湖舊遊  
南宮交代

江海多豪氣朝廷有直聲何言馬蹄下一旦是佳城

傷桃源薛道士

壇邊松在鶴巢空白鹿閑行舊逕中手植紅桃千樹發  
滿山無主任春風

王思道碑堂下作

蒼蒼宰樹起寒烟尚有威名海內傳  
四府舊聞多故吏  
幾人垂淚拜碑前

遙傷丘中丞

并引

河南丘絳有詞藻與余同升進士科從事鄴下不幸遇  
害故為傷詞

鄴下殺才子蒼忙冤氣凝枯楊映漳水野火上西陵馬  
鬣今無所龍門昔共登何人為弔客唯是有青蠅

傷獨孤舍人

并引

貞元中余以御史監祠事河南獨孤生始仕為奉禮郎  
有事宗廟郊時必與之俱繇是甚熟及余謫武陵九年  
間獨孤生仕至中書舍人視草禁中上方許以宰相元  
和十年春余祇召抵京師次都亭日舍人疾不起余聞  
因作傷詞以為弔

昔別一年少今悲喪國華遠來同社燕不見早梅花

逢次數水驛伏覩華州舅氏昔日行縣題詩

處潸然有感

昔日股肱守朱輪茲地遊繁華日已謝章句此空留蔓草佳城閉故林棠樹秋今來重垂淚不忍過西州

湖南觀察使故相國袁公挽歌三首

五驅龍虎節一入鳳凰池令尹自無喜羊公人不疑天歸京兆日葉下洞庭時湘水秋風至淒涼吹素旗

丹旄發江臯人悲雁亦號湘南罷亥市漢上改詞曹表墓雙碑立尊名一字褒常聞平楚獄為報里門高

返葬三千里荆衡達帝畿逢人即故吏拜奠盡沾衣地

得青鳥相賓驚白鶴飛五公碑尚在今日亦同歸

代靖安佳人怨二首 并引

靖安丞相武公居里名也元和十一年六月公將朝夜漏未盡三刻騎出里門遇盜薨于牆下初公為郎余為御史繇是有舊故今守于遠服賤不可以誄又不得為歌詩聲于楚挽故代作佳人怨以埤于樂府

寶馬鳴珂蹋曉塵魚文匕首犯車茵適來行哭里門外昨夜華堂歌舞人

秉燭朝天遂不回路人彈指望高臺牆東便是傷心地  
夜夜秋螢飛去來

傷愚溪三首并引

故人柳子厚之謫永州得勝地結茅樹蔬為沼沚為臺  
榭曰愚溪柳子沒三年有僧遊零陵告余曰愚溪無  
復曩時矣一聞僧言悲不能自勝遂以所聞為七言以  
寄恨

溪水悠悠春自來草堂無主燕飛回隔簾惟見中庭草

一樹山榴依舊開

草聖數行留壁壞木奴千樹屬鄰家  
唯見里門通德榜殘陽寂寞出樵車

柳門竹巷依依在野草青苔日月多  
縱有鄰人解吹笛山陽舊侶更誰過

碧澗寺見元九侍御和展上人詩有三生之

句因以和

廊下題詩滿壁塵塔前松樹已鱗皴  
古來唯有王文度



重見平生竺道人

傷秦妹行并引

河南房開士前為虞部郎中為余話曰我得善箏人于  
長安懷遠里其後開士為赤縣牧容州求國工而誨之  
藝工而天今年開士遺予新詩有悼佳人之目顧予知  
所自也惜其有良妓獲所從而不可久乃為傷詞以貽  
開士

長安二月花滿城插花女兒弄銀箏南宮仙郎下朝晚

曲頭駐馬聞新聲馬蹄逶遲心蕩漾高樓已遠猶頻望  
此時意重千金輕烏傳消息紺輪迎芳筵銀燭一相見  
淺笑低鬟初目成蜀弦錚錚指如玉皇帝弟子常家曲  
青牛文梓赤金簪玫瑰寶柱秋雁行斂蛾收袂凝清光  
抽弦緩調怨且長八鸞鏘鏘渡銀漢九雛威鳳鳴朝陽  
曲終韻盡意不足餘思情絕愁空堂從郎鎮南別城闕  
樓船理曲瀟湘月馮夷躑躑舞淥波鮫人出聽停綃梭  
北池含煙瑤草短萬松亭下清風滿

北池萬松皆  
容州勝槩

秦聲

一曲此時聞嶺泉鳴咽南雲斷來自長陵小市東舜華  
零落瘴江風侍兒掩泣收銀甲鸚鵡不言愁玉籠博山  
鑪中香自滅鏡奩塵暗同心結從此東山非昔遊長嗟  
人與弦俱絕

夔州竇員外使君見示悼妓詩顧余嘗識之  
因命同作

前年曾見兩鬟時今日驚吟悼妓詩鳳管學成知有籍  
龍媒欲換歎無期空廊月照常行地後院花開舊折枝

寂寞魚山青草裏何人更立智瓊祠

竇夔州見寄寒食日憶故姬小紅吹笙因和

之

鶯聲窈眇管參差清韻初調衆樂隨幽院妝成花下弄  
高樓月好夜深吹忽驚莫種飄零盡唯有朝雲夢想期  
聞道今年寒食日東山舊路獨行遲

傷循州渾尚書

貴人淪落路人哀碧海連天丹旆回遙想長安此時節

朱門深巷百花開

哭龐京兆

少年有俊氣嘗擢制科之首

俊骨英才氣衰然策名飛步冠羣賢逢時已自致高位  
得疾還因倚少年天上別歸京兆府人間空歎茂陵阡  
今朝總帳哭君處前日見鋪歌舞筵

再傷龐尹

京兆歸何處章臺空暮塵可憐礪鏡下哭殺畫眉人

哭王僕射相公

名播時兼鹽鐵舉亮

于侯一日病滕公千載歸門庭颯已變風物慘無輝羣  
吏謁新府舊賓沾素衣歌堂忽暮哭賀雀盡驚飛


傷韋賓客

自工部尚書除賓客

韋公八十餘位至六尚書五福唯無富一生誰得如桂  
枝攀最久蘭省出仍初海內時流盡何人動素車

再經故元九相公宅池上作

故池春入至一到一傷情雁鷺羣猶下蛙蟪衣已生竹  
叢身後長臺勢雨來傾六尺孤安在人間未有名



劉賓客文集卷三十